

阿文成公年譜

阿文成公年譜卷二十五

受業

王 昶勘定

盧蔭溥增脩

第三孫那彥成恭纂

乾隆四十六年

八月十二日

公偕李侍堯畢沅奏言伏思陝甘二省乃三秦重  
地東連豫晉西達新疆北控邊城南通楚蜀兼以  
崇山峻嶺重複迴繞西面則番族環居內地則民  
回錯處習俗剛勁爲自古用武之地仰蒙

聖明燭照

睿慮周詳以陝甘二省近年以來各營官兵裁撥太多地

廣兵單節次

特降諭旨令臣等酌量添設誠慎重邊陲爲永遠牧寧之

至計也惟是添兵之大要有二一則督提鎮標各  
有兵數千屹然巨鎮勤加訓練平時既可資彈壓  
臨時又足以供調遣一則緊要營堡各有兵數百  
分防駐守時加稽察則聲勢既可聯絡奸宄不至  
潛藏查甘肅提督四鎮除提標及寧夏鎮標毋庸  
議添外其督標五營地居省垣控制宜嚴現存實

兵一千五百三十八名今請設兵三千名應添兵  
一千四百六十二名肅州控扼嘉峪內外爲新疆  
門戶地居衝要現存實兵一千八百三名今請設  
兵二千四百名應添兵五百九十七名西寧鎮標  
現存實兵二千二百九十五名今請設兵二千五  
百名應添兵二百五名涼州鎮標現存實兵二千  
一百四十五名今請設兵二千三百名應添兵一  
百五十五名河州以協改鎮現存實兵九百十名  
今請設兵二千名應添兵一千九十名陝西撫標  
現存實兵七百五十名今請設兵一千名應添兵

二百五十名提督從前本駐固原爲甘省東路襟  
喉且其地去西安蘭州均不過六百餘里呼應既  
兩省可通而西控鞏秦北連延慶均有指臂相聯  
之勢自乾隆二十九年移駐西安固原改設總兵  
兩處額兵隨亦裁減現存實兵一千三百五名今  
提督仍駐固原改設提標五營請設兵三千名應  
添兵一千六百九十五名至西安提標現存實兵  
一千七百四十五名提標業已移駐固原雖有將  
軍副都統大員不能兼轄綠營若歸入撫標統轄  
究係文臣不能專心訓練且提標所屬潼關富平

宜君等營俱在西安東南如仍令固原提督管轄亦恐鞭長莫及請設兵二千一百名應添兵三百五十五名分中左右三營另設西安鎮總兵一員專司操演兼轄附近營汛其兩營官弁卽隨提督移駐固原至陝西延綏興漢二鎮其延榆一帶外接土默特鄂爾多斯阿拉善諸部落久爲臣僕中外一家無須重兵防範惟興漢一鎮與四川湖廣毗連山谷險阻林木深遠周圍三四千里最易納匪藏奸關係緊要舊存實兵一千四百七名今請設兵二千名應添兵五百九十三名至緊要營堡

如河州鎮屬之循化起台保安臨洮西寧鎮屬之  
貴德南川北川巴燕戎格巴暖碾伯肅州鎮屬之  
嘉峪關紅崖堡梨園洪水南古城馬營墩涼州鎮  
屬之莊浪岔山口安遠張義堡寧夏鎮屬之花馬  
池同心城靈州橫城西安鎮屬之潼關神道嶺慶  
陽紅德長武邠州西安城守興漢鎮屬之白土漁  
渡紫陽七里關舊縣關陽平關寧羌畧陽漢鳳漢  
中城守興安城守固原提屬之靖遠下馬關蘆塘  
西安州永安堡八營堡洮岷鞏昌秦州平涼階州  
文縣西固岷州舊洮蘭州城守紅城苦水各等處

現有兵額均不敷防守應請添兵自數百名至數十名不等庶可以守要隘而備捍衛至安定爲鞏昌分汛相距不及二百里駐兵百名把總一員足資防守臣等通盤核算甘省添兵六千五百八十二名陝省添兵六千三百五十八名統計二省衝繁扼要營汛共一萬二千九百四十名除勒爾謹於上年

奏准酌復公糧兵二千名外現在實添兵一萬九百四十名臣等又查向例添兵必須多添將備等員弁於所添兵額內又多佔養廉名糧於事無益今



以提督移駐固原所有請設西安鎮止須安設中  
左右三營將前後二營遊擊守備以及千總外委  
等一併裁移固原以復五營舊制至河州設鎮應  
添左營中軍遊擊一員卽以陝西紅德城遊擊裁  
移守備一員卽以永安守備裁移至循化廳控制  
番回尤關緊要本設兵八百名舊設遊擊一員尙  
不足以資彈壓應以鎮海叅將移駐而以循化遊  
擊改駐鎮海之丹噶爾又循化應添守備一員卽  
於哈拉庫爾裁移紅城堡應設守備卽以永固協  
屬之黑城都司裁改其餘各該處應添千總外委

等亦均於各營內籌酌裁改總期添兵萬餘而將  
備毋庸多議以歸實用再前奉

諭旨兵丁有馬步守三項之分各省大約以馬三步七爲  
率今旣酌爲添設不如竟將馬兵酌添六七千名伏查陝  
甘兩省各營制有馬步各半者馬二步四者馬三步  
守各半者有馬三步三守四者俱屬參差不齊大  
約提鎮各標地居都會及各府平原曠野馬兵自  
較步守爲優而操演亦易得力至僻遠險要營分  
跬步皆山路徑叢雜無所用騎又應多設步守  
等按各該營舊制於新添兵一萬二千九百四十

臣

名內共請添馬兵五千五百八十一名步兵四千二百四十四名守兵二千九百五名外添公費馬步守兵共二百十名至金城關離省城不過二里逼臨黃河與省城聲息相通似可毋庸添兵且該處地方逼窄祇可安設汛兵防守巡緝不能駐扎將領大員是以未列添兵單內奏入

上敕軍機大臣會同該部議奏旋經尙書額駙公福隆安等議言查向來西安將軍原設滿洲兵七千名節經移駐裁減止存三千七百餘名所有西安提標現存之兵應請添足二千一百名照成都將軍象

轄漢兵之制設立軍標中左右三營卽令該將軍一體管轄與滿洲兵就近訓練以成勁旅其另設西安鎮總兵之處應毋庸議至河州西安肅州涼州寧夏安西與漢固原等處各提鎮所屬營堡如循化起台等處或關隘層疊或汎廣差繁在在俱關緊要應如所議河州鎮屬之循化營請設兵八百名應添兵三百三十名保安營請設兵五百名應添兵三百三十八名起台堡請設兵二百五十名應添兵一百五十三名臨洮營請設兵三百名應添兵一百六十五名大通協請設兵六百名應

添兵一百三名永安營請設兵五百名應添兵一百十七名鎮海堡請設兵二百名應添兵五十三名貴德營請設兵七百名應添兵四百五名南川營請設兵一百五十名應添兵二十名亦雜石營請設兵八十名應添兵十六名千戶庄營請設兵五十名應添兵二十五名北川營請設兵一百五十名應添兵三十四名巴燕戎格營請設兵三百名應添兵五十一名巴暖營請設兵一百五十名應添兵十八名康家寨營請設兵六十名應添兵二十名能思觀營請設兵四十名應添兵十三名

碾伯營請設兵一百五十名應添兵四十名肅州  
鎮屬之嘉峪關請設兵三百五十名應添兵七十  
九名鹽池堡請設兵八十名應添兵四十一名紅  
崖堡請設兵一百名應添兵三十一名梨園營請  
設兵一百五十名應添兵七十五名洪水營請設  
兵三百名應添兵六十名南古城請設兵一百五  
十名應添兵八十四名馬營墩請設兵一百名應  
添兵十七名涼州鎮標五營三邊重守控制羣番  
請設兵二千三百名應添兵一百五十五名涼州  
鎮屬之莊浪營請設兵五百名應添兵一百五十

四名岔口營請設兵二百名應添兵九十四名安  
遠營請設兵二百名應添兵六十六名古浪堡請  
設兵一百名應添兵六名黑松堡請設兵八十名  
應添兵二十二名武勝營請設兵五十名應添兵  
七名張義堡請設兵一百三十名應添兵七十三  
名西把截營請設兵一百名應添兵三十一名寧  
夏鎮屬之花馬池請設兵四百名應添兵一百二  
十三名同心城營請設兵一百名應添兵十七名  
惠安營請設兵五十名應添兵十一名韋州營請  
設兵五十名應添兵十一名靈州營請設兵四百

名應添兵九十三名橫城營請設兵一百五十名  
應添兵二十一名西安城守營請設兵三百六十  
名應添兵八十一名慶陽協請設兵三百五十名  
應添兵八十二名長武營請設兵二百二名應添  
兵七十一名邠州營請設兵一百九十名應添兵  
六十三名涇州營請設兵一百五名應添兵三十  
三名潼關協請設兵六百五名應添兵一百六十  
名神道嶺營請設兵一百五十名應添兵十二名  
興安城守營請設兵三百二名應添兵一百十二  
名白土路營請設兵四百名應添兵五十名漁渡



路請設兵四百名應添兵五十二名紫陽營請設  
兵四百名應添兵一百二十名七里關營請設兵  
二百名應添兵六十一名舊縣關營請設兵五百  
名應添兵二百九十六名漢中城守營請設兵六  
百名應添兵一百十八名漢鳳營請設兵五百名  
應添兵九十九名陽平關營請設兵三百名應添  
兵六十五名寧羌營請設兵四百名應添兵一百  
三十六名畧陽營請設兵三百名應添兵二十七  
名固原城守營請設兵五百十五名應添兵一百  
五名靖遠協營請設兵四百十名應添兵一百六

名下馬關營請設兵二百二十一名應添兵五十

九名蘆塘營請設兵二百名應添兵六十六名西

安州營請設兵一百十名應添兵二十九名八營

堡請設兵六十七名應添兵二十名洮岷協營請

設兵六百三十五名應添兵八十五名階州營請

設兵四百二十名應添兵五十九名文縣營請設

兵二百八十名應添兵三十名西固營請設兵二

百四十名應添兵四十七名岷州營請設兵一百

六十名應添兵四十四名舊洮營請設兵二百一

十名應添兵六十八名秦州營請設兵二百三十

名應添兵二十八名鞏昌營請設兵六百六十名  
應添兵三百五十四名鞏昌營應駐兵一百名卽  
於鞏昌營撥足一百名蘭州城守營請設兵五百  
一十名應添兵一百五十名金縣營請設兵五十  
名應添兵十三名紅城堡改設守備營地當孔道  
請設兵一百名應添兵七十一名苦水堡請設兵  
五十名應添兵三十名平涼城守營請設兵五百  
名應添兵三百五十三名至所議外添公費兵二  
百十名尙係相沿成例現在欽奉

上諭各省營伍所有賞卹等項俱著於正項支給等因欽

遵在案其所請外添公費兵應毋庸議又添兵必  
須增設將備等員應如所議西安提標現已議歸  
西安將軍管轄應卽將原設提標之中左右三營  
作爲軍標其應設中軍副將一員卽以原設中營  
遊擊改補應添設中營中軍都司一員其中營守  
備及左右二營遊擊守備千把外委等俱有原設  
員弁無庸增設至固原移駐提督應添設兩營卽  
以西安原設提標前後二營遊擊守備及千把外  
委等員弁裁移固原至河州設鎮應仍設左右二  
營其左營應添中軍遊擊一員卽以陝西紅德營

遊擊裁移其原設都司一員改爲右營都司守備  
一員卽作爲都司中軍左營應添千總一員於臨  
洮營裁移右營應添千總一員於寧夏興武營裁  
移應添把總一員於哈拉庫圖爾營裁移應添經  
制外委二員卽在左右二營額兵內拔補又循化  
應添中軍守備一員於哈拉庫圖爾營裁移應添  
千把總各一員於寧夏中衛營裁移應添外委二  
員卽在該營額兵內拔補其鎮海營改設遊擊卽  
將舊有千總一員作爲中軍哈拉庫圖爾營應添  
千總一員於大通協裁移貴德營應添把總一員

於永寧裁移應添外委一員卽在該營額兵內拔  
補永安營舊有千總一員卽作爲該營遊擊中軍  
千總保安營應添把總一員於肅州金塔寺營裁  
移寧夏興武營舊有把總一員卽作爲都司中軍  
紅德城營原駐遊擊旣撥移河州鎮標其紅德城  
營以延綏鎮波羅協清平堡守備移駐其清平堡  
事務以寧塞堡分防寧條梁汎把總移駐所有寧  
條梁汎卽以清平堡經制外委移駐至紅城堡應  
設守備一員以永固協屬之黑城都司改補同原  
設弁兵按數移駐其紅城堡把總一員同兵丁移

駐黑城堡止畱原設把總一員經制外委一員額外委一員其餘經制額外委各一員一併移駐紅城堡改屬涼州鎮管轄其餘均應如所議辦理奏入得

旨允行

公偕李侍堯又奏言查甘省額設兵五萬六千六百零一名除節次裁撥移駐扣畱公糧並公費養廉屯防兵二萬二千九十七名外實存兵三萬四千五百零四名陝西額設兵三萬四千五百九十二名除節次裁撥移駐扣畱公糧並公費養廉屯

防兵一萬三千一百七十四名外實存兵二萬一  
千四百十八名通計陝甘二省共存兵五萬五千  
九百二十二名較原額少兵三萬五千二百七十  
一名內歷年裁撥移駐新疆眷兵九千七百六十  
名各官養廉公費兵九千九百七十五名屯防兵  
七千八百五十四名扣存公糧七千九百三十名  
至公糧因何扣存不補之處查係乾隆二十一年  
前督臣黃廷桂任內因陝甘兩省辦理軍需綠旂  
各營公私借墊頗多欽奉

諭旨免其扣抵奏准於兩省兵數內酌扣公糧十分之一



共銀二十四萬六千五百餘兩通融彌補嗣於二十六年扣案清完即將此項節省銀兩歸入新疆經費項下調用支銷至畢沅前奏陝甘此時兵力合計不過萬餘一節其意因固原鎮雖屬陝西提督管轄而所管各營則在甘肅地方故未列入且彼時提標及興漢延綏兩鎮俱已派調兵數千是以止剩萬餘其甘省存兵雖尙有三萬四千餘名但一提四鎮與各協營以至嘉峪關外安西河州靖遠三營東西南北相距數千里地方遼濶堡戍繁多所有額兵除派安墩汛隘口及遠近差使外

其實在存營差操兵已屬寥寥且逆匪起事時省城一帶兵力單弱遠處徵調緩不濟急倉猝之際更不免左支右絀此當日實在情形也再部中所查兵數與現在迥不符合其故總因養廉公費俱佔名糧一經裁移改撥牽混不清不特難於查核且恐易滋弊竇應請嗣後陝甘兩省每年造具兵冊送部時將實在馬步守兵爲一冊其養廉公費兵另爲一冊如此則案牘不致混淆而支銷各有定數較爲妥善如蒙

俞允並請

敕下該部通行各省均照此辦理奏入

上敕原議大臣一併議奏旋經尙書額駙公福隆安等議  
言查陝甘二省現存實兵較原額數共少三萬五  
千二百七十一名業據大學士公阿桂等酌請添  
補經臣等議准具

奏至兵丁賞卹銀兩現奉

諭旨俱於正項支給報銷所有陝甘扣存公糧公費各款  
應令該督等查明核辦又陝甘節年開報兵數應  
令該督撫各按省分將實在正額馬步守兵爲一  
冊其屯防移駐各兵另爲一冊分晰造報庶額兵

定數相符不致牽混滋弊併通行各直省一體遵照辦理奏入得

旨允行

公偕李侍堯又奏言竊照營伍之制其應歸各提鎮管轄者必須遠近適中始足以重操防而嚴控制陝甘二省現已遵

旨增添兵額以備捍衛所有各路營協堡汛有宜斟酌變通者如西安提督仍駐固原除應設中左右前後五營外其原屬固原鎮之固原城守靖遠蘆塘西安州永安堡平涼秦州鞏昌九營應改歸固原提

督統轄又西安提督原管之慶陽協紅德涇州兩營應仍歸固原提督統轄西安添鎮仍設中左右三營外其提督原管之西安城守潼關協神道嶺商州金鎖關富平西鳳宜君各營應歸西安鎮統轄又邠州長武二營原隸慶陽協查該營在陝西地方距西安較近應改歸西安鎮統轄河州改鎮應設左右二營外其原管之循化保安起台臨洮並撥歸固原之洮岷舊洮岷州西固階州文縣蘭州城守各營俱仍歸河州鎮統轄又紅城苦水二營向係蘭州城守所屬該二處在莊浪迤東七十

里至一百二十里距涼州較近且在黃河迤西應  
改歸涼州鎮屬之莊浪營叅將管轄至肅州鎮向  
轄金塔永固二協嗣於乾隆四十二年將肅州口  
外之安西協將等十一營汎改歸肅州鎮屬所轄  
不爲不多而永固協所屬各營俱在甘肅地方向  
來一切文移由甘州提督咨行肅州鎮復由肅州  
行文永固往返紆迴每至稽遲貽悞應將永固協  
並所轄甘州城守大馬黑城洪水馬營墩山丹破  
石梨園南古城十營堡改歸甘州提督統轄不惟  
文移往返不致紆繞而一切考驗巡查俱爲近便

於軍政大有裨益奏入

上敕原議大臣一併議奏旋經尙書額駙公福隆安等議  
言應如所奏辦理至西安現經臣等議請設立將  
軍標其提督原管西安城守一營近在同城應卽  
歸將軍管轄其潼關協神道嶺商州金鎖關富平  
西鳳宜君各營及慶陽協屬之邠州長武二營應  
仍歸固原提督統轄以符舊制而重責成奏入得

旨允行

公偕李侍堯又奏言陝甘二省兵丁遇有紅白賞  
卹事件向來於惠濟項下動支陝省原有銀六萬

三千兩甘省原有銀十一萬三千餘兩俱交商營  
運每年所得息銀除賞給兵丁紅白事件外尙有  
盈餘自乾隆三十三年停止以後所有陝省惠濟  
銀六萬三千兩又以息作本并存剩息銀二萬六  
千七百七十餘兩甘省惠濟銀十一萬三千餘兩  
又以息作本并存剩息銀共十五萬三千四百餘  
兩概行撥充兵餉等項其陝省兵丁紅白賞銀在  
朋合銀內支給甘省兵丁紅白賞銀在裁馬改步  
節省銀內支給查裁馬改步及朋合二項銀兩雖  
係各就營中通融節省而其實仍歸於開銷帑項



況甘省現請添兵六千五百餘名內添馬兵二千七百餘名所有裁馬改步節省銀兩自應仍撥充現添馬兵之用若既添馬兵而復摘缺停補於體制更屬未協至陝省現添兵六千三百餘名朋舍一項亦恐不敷支給皆須另請動款撥補伏思

皇上添設陝甘兩省兵額原爲捍衛邊陲起見不惜多費帑金第

國家經費有常亦不可不通盤籌畫前各省撤回惠濟銀兩緣生息名色

特敕停止查此項銀兩雖屬交商營運而所獲息銀俱爲

預備賞卹兵丁之費

國家本無取利於其間臣等公同籌酌陝甘兩省現

請添兵一萬二千九百餘名並原有兵五萬五千九百二十二名其從前惠濟銀兩似當仍請復設惟查原定交商營運甘省係一分五釐起息陝省則一分五釐一分二釐不等定數未免稍重可否

仰懇

天恩概定一分二釐以下行息餘俱照舊例遵辦再臣阿

桂前在雲貴知該省自停止生息銀兩後所有兵丁紅白事件俱以裁減兵額節省銀數充賞查滇

黔等處俱係邊陲兵力亦不宜單弱若將生息銀兩復舊卽所裁兵額仍可補足於防守實爲有益其他四川閩廣或係邊地或係海疆亦關緊要容俟臣阿桂回京後查明再行請

旨辦理奏入

諭曰據阿桂等奏請酌復惠濟銀兩以裨營伍一摺固爲兵丁需費起見添兵自當添賞卹然總屬無多且現在所有兵丁其賞卹本卽動用正項豈果有不敷之處以致不行賞卹乎若奏聞國家賞兵之費藉商營運支給其名究屬不美况現在戶部庫項充盈卽陝甘二省添

設兵丁所需紅白賞卹費用較多原當開銷正帑著傳諭阿桂李侍堯畢沅所有此次添兵之費及將來甘陝二省兵丁紅白賞卹事件俱著動用正項開銷

公偕李侍堯又奏言

臣等遵

旨確查甘省奏請添建倉廩一節查工部單內所開甘省自開捐以後共請添建倉廩二十七案臣等將各廳州縣未經開捐以前倉間糧數與詳請添建時現存糧數比較內西寧大通靜寧三州縣合監糧常平額徵各項糧石而計尙不及乾隆三十九年以前舊存糧數此外隆德淵泉安西玉門敦煌肅

州高台古浪三岔州判禮縣西和清水徽縣成縣  
洮州廳十五廳州縣雖查詳請建倉時糧數比從  
前增減不等但甘省捐監現據各該員供稱俱係  
以銀折糧並不買補還倉其實貯糧數仍較舊額  
短少<sub>臣</sub>等伏思建倉所以貯糧今糧石既無盈餘  
何用添設厰座明係該員等借添建爲名以爲侵  
蝕公帑之計此等捏報劣員卽係現在審明冒賑  
開銷之人將來歸案辦理時自當一併定擬完結  
但該員等種種藉端捏冒情節更重俟分發人員  
到甘卽先行參草審辦所有西寧隆德十八廳州

縣添建廩座二十三案應請

勅部無論曾否建蓋概不准開銷其部中已銷者查明詳請之員及各上司分賠未銷者卽行扣除如銀兩業經給發卽一併追繳至撫彝廳及張掖永昌二縣所存糧石較多舊有倉廩不敷藏貯向來皆係借貸民房廟宇堆積添建尙係有因但是否實在蓋造亦難憑信臣已派軍機司員敷倫泰前往查勘另行具奏奏入

諭曰甘省監糧一項旣屬紙上空文乃該員等復借建倉爲名恣其侵冒是又於冒賑開銷之外設法侵欺其情

節較之冒賑各員更重將來審明定案時必當加倍治罪以爲貪婪狡詐者戒

十八日

公偕李侍堯奏言撒拉爾回人分居十二工離循化地方近者數里遠者數十里皆地處邊外與諸番邊界毗連其風俗情形迥非內地可比今逆回蘇四十三等已就駢誅新教餘孽俱已勦除淨盡臣等查十二工地方惟漢文寺孟達夕厰三工俱係舊教並無新教其蘇四十三所任之查家工韓二個所任之清水工及張朶別列草灘崖慢蘇只

街子打蘇古等七工俱係新舊二教錯居現在止  
存舊教二千六百四十八戶其新教業已殲除所  
有遺存籽種地共二百三十四石零應上額糧十  
九石零並查各工地畝多係山頭地角依崖傍壑  
零星沙地不成片段臣等伏思逆回所遺田土現  
散在九工之內若令內地民人前往耕種則一村  
之內民少回多勢不能彼此相安若於各工零星  
安設汛地少則孤懸邊外難資彈壓多則徒費錢  
糧臣等公同籌酌此次勦除逆匪所有隨同打仗  
之舊教回人頗爲奮勉出力其節次打仗傷亡土



兵共有三百三十餘名現在造冊咨部議卹可否  
迎邀

皇上天恩卽以逆回所遺之田土賞給陣亡士兵等家屬  
交土司韓煜韓光祖確查田土數目酌量人戶多  
寡均勻派撥令其佃種按舊則輸糧仍由循化廳  
徵收伊等每人名下所分籽種地不及一石無慮  
地廣力增在衆回効順捐軀者受賞獨優亦必益  
深悅服而陣亡之戶荷蒙

恩賞得以安居樂業尤必感激

聖慈輪忱向化奏入

上從之

公偕李侍堯又奏言

臣

等前奉

諭旨令將蘭州省城展寬跨山臨水仰見我

皇上慎重巖疆圖維久遠至計伏查營建城垣必須佔據  
形勢方可設險衛民大抵因山爲城則當包括山  
之岡脊若在平坦處建築又須距山稍遠蘭州北  
臨大河西南兩面俱山嶺重疊惟城東一帶地稍  
平衍省城舊係州治規模本小其後添築三面向  
城不過就民居所至隨意裁治全無遠慮所以與  
龍尾山地勢緊接外城西南之安定門離龍尾山

尚有一百四十餘丈外城西門至龍尾山則僅止  
數十丈且山高於城此次撒拉爾逆回一至蘭州  
在龍尾山憑高向城攻打守城兵夫無可遮蔽且  
該處商賈湊集民居稠密又未預畱火道居民牆  
屋直接城垣賊匪攀援攻撲是以卽日而破然至  
外城失守賊匪力攻大城西門雖甕城券洞俱被  
燒燬而大城終能固守無虞者則以賊至城下勢  
須仰攻我兵登堞俯臨木石俱可擊退也但外城  
之破究係以險資賊卽使繕修高峻仍不足恃茲

蒙

聖明指示將西南城垣展寬至龍尾山梁俾西關一帶居民及華林山之半俱包入城內實足以壯觀瞻而資控制惟是龍尾華林兩山中有水磨溝一道山水發時其勢頗猛難以跨築垣牆且龍尾山土鬆沙汕每遇大雨時行卽衝成溝坎或數丈數十丈不等若於其上建築基址旣不能堅實斷難經久臣等公同商度惟有將大城向東展寬西自外城安定門起由拱蘭門迤東至風神廟後又自通遠門東南角起由迎恩門至廣武門北角止共擬新添城垣計長一千一百七十餘丈連舊城五百五

十九丈共一千七百二十餘丈週圍約九里有餘  
雖東北地形稍覺狹窄而限於大河不能展拓其  
西南二郭城俱擬拆去共去舊城二千餘丈所有  
大城甕城俱擬多添一層以爲重關保障所有西  
南兩關廂居民勸諭遷移撤去房屋空出城面寬  
畱火道則崇墉夾峙可以捍制邊陲至華林山近  
在城西數里並可倚爲屏蔽應於其上築營堡一  
座移督標右營一營官兵在彼駐劄並於龍尾山  
上相對大城西南一帶擇據形勢安設空心大墩  
四處卽於右營兵丁內輪派駐守平時則氣象更

覺嚴整有事則東可以護衛大城西可以應接華  
林山營聲勢聯絡更足以資彈壓至此次籌改添  
建各事宜工費浩繁且爲永遠救寧之計必須鞏  
固堅實應請

旨派熟悉城工之大臣一員帶領工部司員至蘭逐一詳  
悉勘估方可興工辦理奏入得

旨允行

公偕李侍堯又奏言

臣等屢奉

諭旨籌辦善後事宜除添設兵數改繕城垣專摺具奏外  
謹將應行事宜酌議數條恭呈

御覽一蘭州省城舊存子母礮十六尊僅與鳥鎗無異施放不能及遠又威遠礮八尊子重十六兩至二十兩轟擊稍遠而施放時易於跳動難得準頭俱不甚得力况年久亦多損壞此次攻勦賊匪照四川劈山礮式樣製成二十尊並於涼州調到食子六十兩大礮四尊轟擊頗爲得用又查涼州鎮屬各營舊貯大礮一百六十六位係前明萬曆年間製造歷年久遠多有脫落炸壞各營視同廢鐵其存貯涼州城內不過二十餘尊餘俱散貯各營堡容臣李侍堯特派熟悉礮位專員逐一勘驗將無用

廢礮盡行銷燬試演堪用好礮分貯督撫提鎮駐  
劄各城如尙不敷揀選涼州匠役鑄造大神礮位  
酌定數目分貯至劈山礮亦應多爲製造督撫提  
鎮大標約計兵丁二百名卽給一尊並飭各營時  
常操演試放以期有準其陝西各標營亦如此照  
辦一回教相沿已久而新教則自馬明心口外回  
家妄謂西域得有真傳黑回厭故喜新俱爲煽惑  
以致蘇四十三等肆逆不法今經此一番懲創之  
後各處回民感懼愧悔出於至誠凡已習新教者  
俱仍改從舊教現已嚴飭各屬將新教禮拜寺概



行拆毀如查有私行傳習陽奉陰違者照邪教律從重辦理並曉諭回民不許稱阿渾名目於回民內揀選老成之人令其充當鄉約隨時稽查互相勸誡其舊俗相沿念經禮拜仍聽其便不准添建禮拜寺及收留外來回人居住日後如有復倡異教者卽行首告指拏如該處實無新教每年令鄉約等聯名具結一次彙齊咨部查核仍先通行出示曉諭如此立法則新教自然淨盡一撤拉爾回人散處十二工環遶循化廳地方每年納糧八十

三石至循化廳河州蘭州等處或貿易或販賣

牛羊本不禁止並有在循化河州充當衙役者以致新教黨羽漸熾與舊教互相仇殺起釁滋事此皆平日地方官不稽查拏究遂至養癰貽患應請嗣後撒拉爾回人不准復充循化廳河州衙役及營伍兵丁亦不准其任意至內地行走其有在各州縣村鎮貿易者由循化同知給與照票定以限期事畢卽令回巢將票繳銷不許在各處逗遛並責成保安起台堡老鴉關駐守弁兵嚴切盤查稽其出入仍隨時訪察毋令內地游匪潛往各該處煽惑滋事亦不得借此勒指需索違者皆重治其

罪凡甘省各屬與番地土司境壤毗連者均應一體仿照辦理一鳥鎗爲閭閻自衛之資從前曾奉諭旨不必概行收禁况番回山居野處平日打牲爲業勢難禁用鳥鎗至硫磺爲配製火藥所必需甘省河東各年配造火藥取資於蘭州庫貯駱狐泉採獲之磺河西各營取資於肅州玉門庫貯牛尾山採獲之磺如果開採時並無透漏封閉後不敢私挖番回何從私行偷買實皆地方官查禁不力所致嗣後飭令該管文武員弁於封閉磺洞選派妥役嚴行稽察屆開採時多派兵役嚴查又聞秦州等

處產礦亦有零星偷挖販賣者應通行嚴查封禁  
不許絲毫透漏至律載內地私販硫磺五十斤炤  
硝一百斤以上者杖一百徒三年窩藏囤販知情  
者俱照私販律治罪應飭各地方官嚴查內地舖  
戶如有將前項磺斤聽番回潛行購買貪得重價  
或不法商民在番回土司地方私賣硫磺並私熬  
炤硝者均照私販及偷買律加等治罪仍令該管  
文武大員嚴飭所屬實力奉行並令將有無私賣  
情弊按季結報如敢虛應故事致滋弊竇一經發  
覺將文武各員及失察各上司一併嚴加叅處一

新疆各城回眾以墨克地方爲回教之宗主而內地回民又以新疆等處經典多而流傳爲較真前奉

諭旨俟將來事竣後傳諭新疆各路辦事大臣嚴密查訪毋許內地回民在彼學習回經致生事端實爲杜漸防微之至計臣等尙恐各城將緣事回民發至內地此等大概皆不安本分之徒與內地回民皆係同教倘因其自西而來以爲得其真傳或又相煽惑均未可定應請

敕下新疆各路大臣此後各城回民有犯發遣等罪者於

各城互相安插不必改發內地於杜絕新教根株之法更爲周備一循化地方已於添兵案內改駐叅將一員設兵八百名足資彈壓至循化同知係乾隆二十六年移駐該處原定疲難二項中缺應歸部選惟是該地番回錯雜一切撫綏控馭必得幹練之員方可勝任實非部選人員所能經理應請嗣後改爲疲繁難三項相兼要缺在外揀員題補又河州太子寺距州一百二十里向設州判一員嗣於乾隆四十一年裁汰查該州地方遼濶漢回雜處其東隅之景古城離州城二百四十餘里

附近之崦隴關卽係番地又正東之黑石山南之  
三渡水等處俱離州城一百八九十里及二百餘  
里不等均係習俗黠悍之區一切稽查匪類撫馭  
番回該州鞭長莫及應請仍復舊制於適中之太  
子寺地方設立州判一員分防稽察其衙署及分  
駐事件各循其舊又該管之蘭州道原係驛傳兼  
巡蘭州向爲衝繁難兼三要缺嗣因驛傳改歸臬  
司管理定爲中缺歸部銓選伏查蘭州道雖只一  
府然地居省會爲兩河扼要應仍改爲衝繁難兼

三要缺請

旨揀放庶人地相宜於體制亦屬允協奏入

上敕軍機大臣會同該部議奏旋經軍機大臣議言均應  
如所奏辦理至私販硫磺及私熬硝磺若在番回  
土司地方售賣雖非內地私販可比查例載附近  
苗疆五百里以內民人煎挖窩囤興販硝磺事發  
計斤定罪以次遞加五十斤以上者杖一百流二  
千里至百斤以上者照合成火藥賣與鹽徒例發  
近邊充軍又例載凡商漁船內夾帶違禁硝磺等  
物接濟外洋者船戶以通賊論斬舵工水手知情  
者同罪各等語是私販硝磺定例內地與邊疆各



有專條而境內私販與出境偷賣輕重迥異今該省境接番回其私賣硝磺關係尤重應請嗣後該省秦州等處產磺地方如偷挖熬煎番回土司地方私賣係在內地者不得照尋常內地之例問擬應比照附近苗疆五百里以內私販之例計斤定擬分別軍流從重科罪若偷賣出境與外地番回交易應比照商船夾帶出洋論斬知情同罪之例審擬庶足以示懲創而嚴關守奏入得

旨允行

公又奏言臣節次奉到河工

諭旨並

御製河工誌事詩敬謹詳讀仰見我

皇上屢念懸懸無時或釋查儀封漫溢黃水北支由趙王  
河沙河至張秋入運東歸大清河入海南支則由  
曹州魚臺流入南陽昭陽微山等湖入江南運河  
臣思黃流既經穿連運河恐致淤阻若目下回空  
糧艘不能行走所關甚要本日接奉初三日

諭旨並抄寄各摺

臣

閱國泰摺所稱入運黃水既由大清

河宣洩以爲順利較前不致過爲湍激並無淤墊  
其水黃色已淡回空糧艘將戴廟荆門等閘相機

啓閉無阻運行其南流之水係由舊運河故道中間下注寬約四五里已至江南沛縣等語是現在黃水溜勢南趨分數居多東省運河諒可無虞但溜勢既入江南仍須由江南運河下注所慮又在江南運河然亦不如亟堵平時入運之水騰空運河使黃水傍有去路不致壅遏生患想薩載自必遵

旨通盤熟商詳悉妥辦此時惟有迅速堵合漫工俾黃水得歸故道河湖一帶俱可安流據韓鏞富勒渾奏連日晴霽料理四路可通該督等諒已上緊施工

以期早爲堵合惟是

皇上宵旰憂勞

臣

荷蒙

委任不能卽至工所竭盡心力會同籌畫稍爲

聖主分憂悽悽寸忱倍深焦急現在冒賑一案大局已定  
卽可分別定擬其有續行解審人犯俱可交督臣  
李侍堯歸案辦理臣俟諸務料理完畢卽起程馳  
赴豫工會同趕堵漫口以冀上紓

睿慮奏入報

聞

二十三日

諭曰阿桂現在查辦甘省一案自己漸有就緒卽此時尙未定案並有各省審訊人員陸續解甘質訊者俱可交李侍堯歸案審辦遵前旨一併分別定擬具奏現在豫省河工漫口開挖引河築挑水壩及堵塞合龍事宜最爲緊要阿桂卽可將甘省審案一面交李侍堯辦理一面起程赴豫督辦

九月初四日

公奏言

臣

查辦甘省監糧冒賑一案兩月有餘嚴

加究問俱已和盤托出所有全案關鍵已得頭緒已清卽有一端一節尙須清釐者督臣李侍堯皆

可以隨事核辦而各員之罪莫大於冒賑侵肥是以現與李侍堯詳悉酌議將分別定擬緣由另摺具

奏至善後事宜亦已次第辦理陸續奏蒙

聖鑒在案現在應訊各員業將侵冒分肥各款逐一供吐此外甘省既無應訊之員而坐待揀發補放人員及由京並各省應解人犯到後定案未免曠日持久臣思此次青龍岡漫口

皇上因關係運道憂勞倍於往常臣荷蒙

委任不能卽至工所會同籌畫稍爲

聖主分憂已覺寢食靡寧若無事坐待倍深焦急况十八

日接奉

諭旨並寄發李奉翰等各摺知現在一面先於壩工淺處  
趕緊輒鑿深水處卽行進埽一面將引河開挑深  
通但引河工數較長淤墊較厚卽加夫分數趕緊  
僦挑亦須五十餘日等語臣於此時起程赴豫計  
算到彼時正屆引河挑挖將完壩工吃緊之際臣  
於河務雖不能熟諳而仰承

皇上重恩親至工次督同趕辦在工大小各員自必上緊  
用力而臣置身事於心亦覺稍安是以酌量緩

急輕重將一切事宜與督臣李侍堯熟商妥議交  
伊定案辦理完結臣卽於二十四日起程前往河  
南工所會同李奉翰等趕堵漫口務期迅速集事  
俾黃河早歸故道並籌辦疏濬河湖事宜庶於明  
春重運無碍以冀上紓

睿慮奏入報

聞

十三日

公偕李侍堯奏言西安添設駐防官兵酌定事宜  
奏請



睿裁一西安原設滿洲蒙古漢軍馬甲七千名步甲一千名礮手弓箭鐵匠共三百四十六名養育兵一千名旋因移駐涼州等處及漢軍兵出旂所贖不及一半應添馬甲二千三百名步甲二百名作爲馬甲五千步甲五百其馬甲請由京城馬甲養育兵步甲閑散內以滿洲七分蒙古三分派往其步甲在西安成了閑散內挑補一西安佐領現在三十二員內有兼協領者四員一員管理二旂應添佐領兼協領者四員分管八旂再添佐領四員每佐領名下應設防禦驍騎校各一員現在西安有出

征能辦事之人請將應添各員各留二缺在此項  
人內選補餘由京城派往一西安現有委前鋒校  
八員前鋒一百二十名應添委前鋒校八員前鋒  
二百六十四名并每佐領下現有領催五名不敷  
差委應復領催六名例共添領催八十名均於京  
城派出馬甲內挑補一每佐領下例設弓箭鐵匠  
各一名應於新設佐領下照例增設又兵百名例  
設礮一位礮手二名現有礮十六位礮手三十二  
名應添礮三十四位礮手六十八名再子母礮不  
如劈山礮便於攜帶應將現存之子母礮并城守

營存貯之子母礮揀給二十五位再鑄劈山礮二十五位給與一協領俱有圖記所有新添協領應擬定字樣咨部鑄給一西安原設滿洲佐領四十員蒙古佐領十六員嗣因蒙古兵爲數無多奏明將蒙古歸併滿洲今新添之蒙古兵請仍歸滿洲管理

公偕李侍堯又奏言西安添設弁兵其應給俸餉請在藩庫支領其糧米粟米料豆在糧道倉內支領如額徵不敷應照例支司庫折色其紅白賞恤銀在開墾馬厰空閒地租內支給其應建官署二

十所兵房四千六百間共估銀三萬九千六百二十兩在官置舖房取租支用餘銀并移驛兵丁衙署變價項內支給有不敷處在藩庫墊給卽按年將房租餘銀解司歸款均奏入下軍機大臣會同兵部議行

十七日

諭曰前據阿桂等奏請酌復惠濟銀兩一摺據稱前在雲貴知該省自停止生息銀兩後所有兵丁紅白事件俱係裁減兵額節省銀數充賞查滇黔等處俱係邊陲兵力亦不宜單弱若將生息銀兩復舊卽所裁兵額仍可

補足其他四川閩廣亦關緊要容俟回京後請旨辦理等語朕以各省兵丁賞需應動正項若藉商營運支給究屬非體已明降諭旨均著於正項支給報部核銷其各省提鎮以下公費名糧亦改照文員之例議給養廉所扣兵餉即可挑補實額並將辦理緣由傳諭阿桂令覈計所費自京營及陝甘添補滿漢兵約二萬名又各省添補綠營兵糧實額亦不下數萬名加以改給養廉紅白賞卹等項每歲所需不過三百萬兩至從前阿桂所奏原爲節省經費起見但現在府庫豐裕儘足供支朕今如此辦理武職旣實得養廉營伍無虛存名目更

無須藉商生息爲贍卹兵丁之用於阿桂意見若何著  
將此傳諭阿桂並令就所見卽行覆奏

二十七日

公奏言臣前次奉到各省營伍賞卹銀兩開銷正  
項及名糧裁添養廉

諭旨仰見

皇上聖謨遠大不惜多費帑金爲足兵衛民之計惟是

國家經費歲有常規有不得不通盤籌畫者臣於乾

隆十年在銀庫郎中任內曾詳悉查核每年各省  
所入地丁關稅鹽課蘆課漕項等銀約三千餘萬

兩災賑蠲緩不在此數此歲入歲出之大畧也又查康熙六十一年部庫所存八百餘萬兩雍正年間漸積至六千餘萬兩而自西北兩路用兵動支大半我

皇上御極之初戶部庫項不過二千四百萬兩自四十六年以來並未加增賦稅而府藏充實國用富饒部庫增至七千餘萬兩

皇上時時以藏富於民爲念凡三次普免天下地丁錢糧兩次普蠲各省漕糧以及遇災卽賑河工海塘歷年各處用兵凡爲捍衛生民計者所費又何啻萬

萬在

皇上原不稍存靳惜但此等動支尙非經費可比夫經費驟加不覺其多歲支則難爲繼從前開拓新疆二萬餘里每年所費卽以陝甘兵額餉糧裁移添補於國用並未加增茲奉

訓諭陝甘各營酌添兵額一萬二千七百餘名西安增設滿兵二千五百名京營添兵四千九百名其馬步糧餉合之各省兵丁賞卹紅白銀兩邊

旨開銷正項約算歲支已有百餘萬兩若又將武職名糧改給養廉其所扣兵餉挑補實額核計歲需又約



二百萬兩以每年額增三百萬經費而論統計二十餘年卽用至七千萬兩况武職所得名糧馬乾由來已久營員本不至拮据今

諭旨改照文員之例一體議給養廉固屬核實辦理而其所扣兵餉似毋需盡行挑補實額伏思滇黔等處控制邊陲兵力不宜單弱川省於平定兩金川後內地兵丁移駐新疆未免不敷守禦其他閩廣海疆亦屬緊要均宜查明增添兵額以資彈壓其陝甘兩省業已派滿漢兵一萬五千餘名併此外省分俱係腹地所扣名糧均可毋庸挑補實額再近

年以來滿漢兵制裁添移改者甚多歲需經費是  
否與從前相彷彿乞

皇上敕交戶部將每年一定出入銀款數目通盤核算並  
將增兵餉養廉三百萬兩之後每年是否尙有餘  
存其各省兵額是否無須一律挑補之處交軍機  
大臣會同該部一併詳悉妥議奏入

諭曰大學士公阿桂覆奏各省武職名糧裁添養廉挑補  
實額一摺國家經費原當量入爲出而足兵衛民爲萬  
年久遠計者又不得少存靳惜之見阿桂現管三庫其  
所奏康熙雍正年間出入大數通盤區畫大臣籌國自

應如是但朕以泉貨本流通之物財散民聚聖訓甚明  
與其聚之於上毋寧散之於下且在官多一分卽在民  
少一分顯而易見朕卽位初年戶部庫銀不過三千萬  
兩今四十餘年以來仰荷

上蒼嘉佑年穀順成財賦充足中間普免地丁錢糧三次  
蠲免漕糧兩次又各省偏災賑濟及新疆兩金川所費  
何啻萬萬而賦稅並未加增非如漢武帝之用桑弘羊  
唐德宗之用裴延齡以掎克爲事致府藏充盈也現在  
戶部庫銀尙存七千萬兩朕又何肯稍爲靳惜乎且以  
歲支頓增三百萬計之至乾隆六十年歸政之時所用

不過四千餘萬兩加以每年歲入所存其時庫藏較卽位時自必尙有盈餘何必於此時鰓鰓過計乎從前海望在戶部時不肯明言銀庫實數其意似恐外人聞之朕彼時卽不以爲是國家惟正之供出入歲有常經原屬大公至正又何必掩人耳目乎甚如明季金花聚斂乃至戶部請內帑亦不肯發則其鄙吝更可笑矣卽以內帑而論憶乾隆初年內務府大臣尙有奏撥部庫銀兩備用之事今則裁減浮費釐剔積弊不特無須奏撥且歲將內務府庫銀命撥歸部庫者動以百萬計又何必以經費不敷歲出爲慮乎至於歲入項下惟米豆關

附錄五方全言卷二十一  
三  
稅一節初年曾經免稅原欲使市價日平乃行之日久並未平減殊不滿朕意後因安寧奏請復收經部議准允行至遇地方歉收穀貴之年原有降旨特免米豆過關之稅所以隨時調劑或商賈多往亦救災區米貴之一法耳今阿桂既籌畫及此但朕意究以多添兵力不惜經費爲是在廷諸臣自必各有確見所有阿桂奏到原摺並朕此旨一併發抄使中外咸知朕意并著大學士九卿科道詳悉妥議具奏

二十八日

諭曰據國泰奏籌辦金鄉城垣圮堤及鄒縣等處續報被

水情形一摺業經降旨撫卹矣昨據薩載等奏報九月初四日沛縣地方風暴大作漫水進城以江南被水情形而論較甚於東省皆由豫省曲家樓缺口尙未合龍是以兩省隣近州縣俱被水患現在工所物料充盈阿桂業經到豫卽著督飭在工文武員弁催趨人夫星夜堵築迅速蒞功以慰廛注

十月二十日

公偕李奉翰韓鏞奏言本月初十一等日因壩工口門收窄溜勢湍激跌過二壩大壩轉向口門兩旁沿壩根跌深三丈有餘至十二日陡陷三十

丈五尺現在趕做裏頭護住壩身又搶下護埽不  
使再有刷場奏入

諭曰此亦無可如何之事惟當盡人力以聽

天佑

神助至現在大溜轉向口門兩旁沿壩板跌深陡坎是大  
溜之勢似與正口門已分作兩股於堵築機宜轉似易  
於得力阿桂等惟有督飭在工員弁多備料物竭力搶  
護趕緊進埽抵禦溜勢使口門漸就窄小尅日合龍仍  
當籌辦堅實加意慎重以期鞏固無虞至此次螿陷之  
處究係在挑水壩之西如在壩東辦理尤易得手摺內

未經叙明者著卽將現在場工情形繪圖貼說呈覽朕  
廩注要工無時或釋想阿桂等目擊情形自深焦急必  
能仰體朕意極力籌辦萬全速期蒞事也

二十一日

大學士等議覆各省武職名糧遵

旨裁添養廉挑補實額現查部庫充裕請不論腹地邊郵  
通行一律辦理

諭曰此次挑補各省名糧議給武職養廉經大學士公阿  
桂奏請除滇黔四川閩廣等省應查明增添兵額陝甘  
兩省業經添設滿漢兵外其餘腹裏省分均可毋庸挑



補實額朕意究以多添兵力不惜經費爲是因交大學士九卿科道詳悉妥議具奏茲據奏現在統計部庫每年出入大數約餘銀九百萬兩有零戶部經理一切裕如所有各省挑補名糧議給養廉請遵照前旨不論腹地邊陲一律辦理等語所奏自係經國久遠之計現今各省督撫將武職名糧逐一查奏俟到齊時軍機大臣會同該部悉心妥議酌定章程奏明遵辦國家設兵衛民原應卒伍充實軍紀嚴明使各省精兵勁旅基布星羅方足以壯聲威而資防禦向來各省督撫提鎮經朕屢加訓飭至再至三此次又經挑補名糧議給養廉各

營兵數旣充訓練更宜實力所有各省督撫提鎮標兵務宜勤加操演使器械進止一一嫻熟該提鎮果能認真通省員弁自必觀感振作悉心訓練一洗從前疲玩之習卽軍裝馬匹等項軍實所關亦應隨時修驗俾各省營伍壁壘一新馬步兵丁練習純熟有勇知方所謂兵可百年不用不可一日不備者此也朕此番整飭後如仍有將不習兵兵不買勇技藝不熟器械不精或經訪聞或欽差大臣查閱必將該管之督撫提鎮從重治罪毋謂朕誠之不早也

二十四日

諭曰昨據阿桂等奏連日因壩工口門收窄濶勢湍激致壩身陡陷三十丈五尺現在趕做裏頭護住又搶下護埽不使再有刷塌等語大濶形勢與正口門分爲兩股於堵築機宜似轉易於得力業經傳諭阿桂等令其將現在壩工壑陷情形繪圖貼說具奏迄今又逾數日其鑲築進掃又有幾分工程約於何日可以合龍朕屢愈要工無時或釋阿桂等務期督飭在工員弁星夜趕緊辦理佇望堵合喜音之至所有賞給阿桂鹿肉並著一併發去

二十八日

公偕李奉翰韓鏞奏言臣欽奉十月二十日

上諭跪讀之下仰見

皇上屢念要工諄切訓勉至意臣等連日督率在工員弁

晝夜趕辦其西壩蟄陷處已補鑲十餘丈上水迎  
溜邊埽亦俱補做齊全鑲壓堅穩壩根鞏固無虞  
搜刷東壩間日進占綠壩前水深數丈每進一占  
約長二丈四五尺並力鑲壓必須鑲至十六七畝  
追壓兩晝夜方能到底穩固堅實計東壩再進四  
占鑲長壩工十餘丈爲期已至十一月初二三彼  
時西壩亦可輒鑲復舊口門漸就窄小不過存十

數丈應卽於兩壩齊進埽箇俟水勢日蓄日高相機開放引河掣溜尅期堵合至此次大溜因挑水壩挑向東南引河未開復折而至西沿西壩壩根跌坎流出口門是以西壩著重致有蟄陷之事原未分作兩股現在跌坎日漸移上頭層已跌過挑水壩二層亦距西壩有五六丈壩根溜勢漸覺平緩至挑水壩係由大壩之西築做挑溜向東南歸入引河此次蟄陷處係西壩東頭挑水壩東北總之堵築漫口水勢變遷原難預料而現在物料應手水力日綿臣等惟有恪遵

訓示不敢稍存大意竭盡心力倍加慎重以期鞏固歲工  
就現在情形而論似尙不致重煩

聖心屢注奏入

諭曰合龍將近惟日望喜音

十一月初四日

公偕李奉翰韓鏞奏言臣等督辦豫工兩壩星夜  
進占現在壩根溜勢較前頗覺平緩口門現存寬  
二十丈以兩壩間日各進一埽而計合龍之期總  
在十一月十五日以前奏入

諭曰看來豫工合龍之期已近惟亟待喜音已於摺內批

示阿桂於上年冬底奉差出京距今已屆一年將來堵  
築完竣善後事宜係韓鐸本任應辦之事且現在福隆  
安因病予假阿桂於合龍後卽著回京供職不必仍畱  
工次

十四日

公偕李奉翰韓鐸奏言臣等於本月初五日將兩  
壩進埽口門收窄加意趕辦各緣由恭摺具

奏在案數日以來東西兩壩又各進一埽口門止剩  
寬四丈俟追壓到底卽將壩台增長掛纜堵合初  
八日丑刻大河水勢陡長三尺餘大溜直撞口門

湧激異常壩工立見行蟄臣等督飭將備趕緊鑲  
壓隨鑲隨蟄搶至卯刻東壩之頭陡蟄丈餘在壩  
員弁兵夫并力搶護終被揭去埽上坯鑲十餘丈  
入水壩根尚存水底西壩亦復平蟄丈餘趕緊搶  
鑲幸而無事此番蟄塌寔出意料之外臣等目擊  
情形倍深焦灼現將出水矧矮者趕緊加鑲入水  
不深者用船補做俟收拾平整卽行進占西壩亦  
令加鑲土坯增長壩台以期穩固堅實查此次走  
失壩上坯鑲連口門僅止十四丈尙易趨辦上緊  
施工計旬餘卽可竣事奏入



諭曰據阿桂等奏本月初八日大河水勢陡長三尺餘大  
溜直撞口門湧激異常東壩頭陡蟄丈餘揭去隄上坯  
鑲十餘丈西壩亦復平蟄丈餘現在趕緊加鑲俟收拾  
平整卽行進占等語此次事屆垂成復遭蟄陷誠屬可  
惜然亦無可如何之事已於摺內批示當此水勢洶湧  
開放引河自無他慮阿桂等何不督率在工員弁卽將  
引河開放俾勢若建瓴掣動大溜歸入正河或可乘此  
機會進埽合龍阿桂等何未見及此耶此時惟有加意  
慎重相機進占舍此亦別無辦法其現在走失壩上坯  
鑲及口門亦僅止十四丈趨辦尙不甚難朕盼望要工

合龍每日齋心默禱以期

天祐

神助阿桂等在工督辦想亦益加敬凜以仰副朕懷

十九日

公偕李奉翰韓鏞奏言數日以來東壩場失處所均已補鑲齊全追壓平整穩實並經進做一占加鑲高厚西壩亦一律增長壩台盤壓穩固十六日西壩先進一埽十七日東壩再進一埽則口門止存寬九丈督令層土層柴并力追壓約三晝夜方能到底穩固堅實目今正值凌汛雖河水時長時

落而蓄水已增二尺大溜直逼引河頭刷厓動盪  
勢甚順利查堵築漫工原必須開放引河使水有  
去路方易於堵合此次所挑引河形勢本屬就下  
無如前此數層跌坎之後將河底刷成深槽大河  
水面轉低於引河數尺且灘面縱橫大溜東流西  
折距引河已遠雖有挑水壩不能爲力臣等目擊  
情形本懷憂懼但萬餘丈之引河斷不能再行加  
挑惟望口門收窄水勢蓄高或可希冀有成乃至  
初六七等日口門止存四丈水仍未長不能開放  
以致上游水至復有衝失之事臣等所以未經奏

明者亦因無法籌辦徒致多煩

聖心憂勞今自場失以後口門既寬長水消洩之後水勢自應更落而連日察看水誌長多消少且漚勢直到引河頭堰外原無水處皆有水自二三尺至五六尺不等蓋因揭去坯鑊之後壩根尙存水底水從高處漫過深處漸次淤高變成極好機會亦未可定臣等揣度情形現下兩埽追壓到底後引河堰外水勢必當蓄高測量可以進水三四尺先行相機開放掣漚再於兩壩各進一埽卽掛纜堵合計期當在二十五六日臣等急欲葺工現雖連日

大雪仍督率在工員弁晝夜趕辦不敢稍有疎懈  
奏入報

聞

二十五日

公偕李奉翰韓鏞奏言臣等於本月十九日開放  
引河初開之時雖未能勢若建瓴奔騰下注而流  
行尙覺暢順帶溜惟正值雪消帶有客水隨即消  
落一尺若從此逐漸掣吸趨瀉湍激可望有成奏  
入

諭曰此奏殊未明晰朕心深爲懸注自十九日開放以後

迄今又逾數日全漚究竟曾否掣動客水消落尺許之後曾否復經長發其下注之勢水頭奔瀉約到江南何處地方現在逐日進埽柴坯上又用重土追壓其口門究存若干丈朕屢念要工無時或釋竚候喜音日夕懸望著傳諭阿桂等卽速將現在情形及何日可以竣事之處據寔由驛卽行覆奏

二十六日

公偕李奉翰韓鏞奏言臣等於二十二日東壩先

下門埽一箇次日復下西壩門埽兩埽入水俱極平穩現在層土層柴晝夜并力加鑲東壩鑲至二

十餘坯西壩亦鑲十餘坯雖尙未追壓到底而口門愈窄壩前水勢又較前蓄高數尺湍激倍常引河內前因有數段地面稍高流行未暢之處臣阿桂派軍機司員會同河北道朱岐開封府康基田督率人夫連夜上緊加工挑挖一律寬深現在黃流趨瀉較前更覺暢順無阻至大河全溜看來須俟合龍後方能盡歸引河此時壩工正在喫緊之際俟埽箇入水漸深追壓穩固卽增長壩台高厚堅寔相機趕緊堵合仰賴

皇上洪福

天神默佑竣事葺工當不出此數日內臣等惟有益加敬  
凜竭盡心力督率在工員弁慎重妥速辦理奏入  
諭曰覽奏稍慰看來黃河全溜必待合龍始能盡歸引河  
惟有默祈

天助

神佑迅速葺工企望喜音益切屢念

三十日

公偕李奉翰韓鏞奏言臣等督率在工文武員弁  
晝夜趕辦東西兩壩所下門埽俱已追壓堅實壩  
台增長高厚卽於二十六日辰刻堵合天氣晴明



人夫踴躍層柴層土晝夜鑿壩二十七日午刻追  
壓到底金門下業已斷流大溜全歸引河奔流下  
注場厓淘底衝刷寬深測量中泓已有一丈四五  
尺流行迅駛此時將近江南交界伏思此次青龍  
岡漫口關係運道民生尤爲

聖心廩念且壩工長三百三十丈引河幾及萬餘丈工程

甚鉅

臣等奉

命督辦如展長挑水壩開寬引河之處節次俱蒙

聖明指示遵照辦理前次跪讀

諭旨敬悉

皇上軫念災黎齋心虔禱今合龍之際風日稍和事機安順益見

誠敬所孚

天神嘉佑得以竣事蒞工臣等實深慶幸現在初經堵合不敢稍存大意惟有倍加謹凜催督兵夫接做邊埽幫完裏戩加高壩工務期益臻穩實奏入

諭曰此次青龍岡漫口於半年中卽已堵築完竣較爲迅速且係北岸視南岸施工爲倍難今已僭辦蒞功甚屬可嘉阿桂韓鐸李奉翰富勒渾並著交部議叙至此次要工合龍固由在事諸臣辦理得宜而

河神默助得以順軌安瀾自當顯示褒崇用酬

神佑並著韓鏐等於該處建造龍王廟候朕親書匾對發

往懸挂並將朕御製合龍誌事詩發刻立碑以昭靈貺

恭錄

御製詩

大學士阿桂等奏報青龍岡壩工合龍詩以誌事

邇年瓠子屢河工今歲北開更切忡

戊戌秋儀封決口庚子睢寧之郭家渡考

城之張家油房均在南岸漫決今歲七月青龍岡漫口則移在北岸以有關運道較從前南岸屢念尤切搶水

引渠相悉慮

今歲青龍岡漫口所最慮者運河及微山等湖淤墊屢經傳諭薩載國泰等相機開放節

宣以期暢達歸海嗣據薩載等奏報豫省漫水由微山湖下注邱宿桃清運河出揚莊口門歸海并將駱馬湖竹簍

牓先行開放其餘各牓亦次第放洩水由劉老澗下  
注六塘河歸海是來源雖大而去路亦多運道湖河得保  
無虞實不幸  
昏民墊戶自慙躬深冬始得合龍告善後益

中之幸也  
廩哀雁窮  
十一月三十日阿桂等馳奏連日督率在工文

武晝夜於東西兩壩趕下門埽追壓堅實壩台  
增長高厚於二十六日辰刻掛纜堵合二十七日上午刻金

門斷流大溜全歸引河衝刷寬深量測中泓一丈四五尺  
流行迅駛此時已到江南交界等語覽奏深為欣慰因降

旨將阿桂李奉翰韓傑富勒渾交部議叙其在事文武各  
員並令查明一體議叙此次北岸開口於數月之內合龍

堵築迅速實賴河神默助因敕韓傑等於該處建造龍  
王廟以昭神貺又江南浦縣被災較重飭發兩淮鹽課銀

五十萬兩交與薩載妥協經理以爲修葺城垣撫卹災黎  
之用

天佑心欽敢言報速因

神助建祠崇

十二月初二日

公偕李奉翰韓鐸奏言本月十九日開放引河後水勢蓄高黃流漸次趨瀉至二十六日掛纜合龍次日午刻金門下立見斷流大溜全歸引河奔赴下注人人無不慶幸以爲成功乃於二十七日亥刻東壩頭及金門一帶陡墊寬五十餘丈大溜全挈仍從漫口下注請將<sub>臣</sub>等交部治罪至北岸漫口關係運道民生此次堵合後仍行衝塌成功益無把握况工程鉅大亦非旬月可以蒞功<sub>臣</sub>阿桂與<sub>臣</sub>李奉翰韓鐸別無良策或現在內外大臣中

諳習河工者求

皇上派令來豫熟籌妥辦於事不無少裨奏入

諭曰此次漫口合而復開人力所不及施寔出意外尙非  
在工諸臣經理不善之過其所請交部之處著加恩寬  
免至前此奏報合龍後曾降旨將阿桂等議叙此時壩  
工既未能告蒞若卽邀錄叙阿桂等心有未安朕亦引  
以爲愧所有前次交部議叙之處著停止

又

諭曰此次壩工螫陷實出意外朕細加推求或因天氣嚴  
寒用凍土追壓未能堅實致有罅漏進水復有此變亦

未可知但是否實係如此情形著阿桂等悉心訪察具奏至阿桂另摺奏請於內外大臣中諳習河工者派令來豫熟籌妥辦等語此可不必近年諸臣中經理河務較有把握者舍阿桂豈復有人卽如嵇璜早有令河流仍歸山東故道之奏此語豈復可行無論黃河南徙自北宋以來至今已數百年卽以現在情形而論其向北泛溢之水由趙王河歸大清河入海者祇有二分其餘由昭陽南陽等湖南下者仍有八分甚至江南沛縣城垣被衝則南下之水勢較北更大此時豈能力挽全河之勢使之盡由北流且於山東直隸運道往來甚有關

礙豈容妄議更張爲今之計惟有就事論事救弊補偏此外別無辦法阿桂等惟當安心靜鎮另籌妥辦以期

天佑

神佑早得蒞功至現在朕前辦事雖覺人少但阿桂不能卽離要工亦不必過爲焦急

初六日

公偕李奉翰韓鏞富勒渾奏言青龍岡大壩合而復開業經於十一月二十八日馳

奏次日臣等卽親至引河一帶逐段察看情形自青龍岡至孔家莊十餘里河面衝刷甚寬水痕業已



漫灘寬處竟有二百餘丈而自孔家莊至田家寨七八里黃流止於所挑數十丈河面內行走並未塌厓緣該處一帶挑深一丈五六尺不等兩岸既高且係灘地凍土衝刷不動河面狹處止寬二十餘丈水勢致收束逼窄不能暢流直注過此至榮華寺楊家堂十餘里係沙土鬆浮易於衝刷而上一段阻滯不能迅駛以致全黃之水宣洩不及蓄積壩前長至二丈餘衝塌埽工其受病之原實在於此伏查此次開挑引河因正河淤墊與灘地相平卽在河身內挑挖引溜必須開至舊有河形處

方可間段抽溝是以長至七千九百餘丈爲從來  
堵築漫工所未有查治河書內引河不得過千尺  
最忌太長蓋長則水被束住不能迅疾宣暢而救  
長之病惟有加寬一法又恐曠日持久壩工不能  
停待籌辦原屬不易臣李奉翰臣韓鏞臣富勒渾  
於八月內估定丈尺具奏時原奉有

諭旨諄切訓誡不可欲速而致疎忽並於引河圖內用  
硃筆標記令照此一律加展寬深仰見

皇上至聖至明慮周鑒遠臣李奉翰等遵

旨將原估寬四十丈者加寬十丈寬二十丈者加寬六丈

似覺可以容納且彼時大河水面高於引河數尺原有建瓴之勢計算挑完開放未至冬深土凍衝刷尙易而臣阿桂抵工後查勘其過窄之處曾經奏明加寬以順其勢而卽此原估丈尺尙屬不遺餘力晝夜嚴催方能如式完竣又因跌坎太深大河水低於引河內抽挖子溝勢不能再行加寬若早知如此寧可遲待旬月於兩壩口門存寬二十餘丈時將壩工暫停竭力展挑引河以冀暢達亦可以一舉蕺工乃臣等見不到此以致功敗垂成現在惟以前事爲鑒亟籌補救之法將青龍岡起至

孔家莊榮華寺楊家堂七千餘丈引河原挑口寬  
五十丈至十八丈者一律加足自三十丈至五十  
丈其應挑深者並加挑深如此一律加寬則口門  
收窄開放引河時宣洩暢利合龍後壩前長水斷  
不至於二丈可期堵合穩固所有加挑引河現已  
遴選州縣中素屬能事者三十餘員分段承挑派  
知府數員總理督催但時值臈月冰堅土凍施工  
較難以每日出二萬方土計日論工按工定限須  
三十餘日方能挑完雖爲時稍遲然不如此亦不  
能望其有成至現在蟄陷處所上水深五六丈下

水深二三丈俱有埽底並未刷深俟收拾淨盡仍可於原處輒鑲進占目下須俟展挑引河壩工儘有餘力每進一占更可加倍鑲壓較前自益穩固堅實奏入報

聞

十一日

公偕李奉翰韓鏞富勒渾奏言欽奉十二月初二日

諭旨跪讀之下仰蒙

皇上恩慈體卹

溫諭慰存感激彌深悚慚愈切數日以來臣等悉心體貼細意推求壩工於合龍後堅持兩晝夜不爲不固而水頭於二十九日子時已到江南礪山境未嘗無就下之勢其所以合而復開者皆由孔家莊迤下數千丈引河止寬二十餘丈水勢至此收束逼窄不能暢流直注以致全黃之水宣洩不及蓄積壩前埽工皸裂衝塌而臣等從前之所以慮不到此者因正河身內挑挖引河淤墊未久希冀新淤見水卽去孰知灘地凍土衝刷不動現在公同籌酌將青龍岡起至孔家莊榮華寺楊家堂七千丈

引河一律加寬自四十丈至五十丈不等其應挑深者並加挑深約估土方一百十餘萬如此加展寬深則開放時計其容納之水較前多至一倍有餘自必迅疾宣暢壩工不至著重易於堵合穩固是揣度事勢似有可成之理仰賴

皇上洪福軫念災黎齋心祈禱更有必成之機又臣等伏讀

諭旨內稱壩工蟄陷或因天氣嚴寒凍土追壓未能堅實致罅漏進水復有此變亦未可知但是否係如此情形著阿桂等悉心訪察具奏欽此仰見

聖明洞鑒於工次情形無微不至無遠勿照查堵築漫工  
大抵時值嚴冬其層層追壓之土不能不凍而此  
次<sub>臣</sub>等晝夜在壩見重車裝載土料於壩上行走  
並不覺其震動而至進埽時以三十萬斤重之物  
從壩唇滾下並未壓動則其堅實可知且向來壩  
工於合龍後新做柴工難免稍有罅隙腰漏掛簾  
皆常有之事此次堵合後直至水長一丈六尺始  
見腰漏其受病似不在此惟東壩於淺水內進做  
長水搜刷不能如西壩之穩固現擬於上水用膠  
泥築做外餞一層並於貼進餞壩加鑲防風以爲



重重保護較前似益穩固至引河第二段土方較  
多現已將在工各員先派定段落開工挑挖其三  
四段及第一段亦俱估定土方各該員陸續到工  
卽分派承辦初十日以內俱可到齊開挑臣等督  
令加添人夫上緊趕辦責成各府晝夜嚴催計算  
正月初旬前後方能挑完堵合之期大約在上元  
前後臣等疊經變故惟有益加慎重計圖萬全斷  
不敢稍存欲速之見盡心竭力籌畫妥辦俾引河  
十分通暢壩工加倍鞏固以冀竣事葺工奏入

諭曰壩工合而復開雖係引河逼窄宜洩不暢或因天寒

土凍工作不能堅實所致前此籌辦時阿桂等何以未會計及此時惟當益加慎重步步穩實以期開放時機勢順利保固無虞至前年儀封十堡漫工堵合後亦有蟄陷之事其時引河亦仍復挑展寬深係若干丈尺現在籌辦情形自應卽仿照前次寬深一律辦理并將所做丈尺與今次所做丈尺是否相同查明具奏再阿桂等昨所進河圖其中尙有未甚詳悉之處并著將現在挑挖工程約有幾分及兩壩如何鑲築進占情形再行詳細繪圖貼說呈覽朕廑念要工無時或釋阿桂等前次奏報後又閱數日現在如何設法趨辦著卽迅速由

驛覆奏以慰懸注

二十二日

公偕李奉翰韓鏞富勒渾奏言

臣等欽奉十二月

十三日

諭旨臣等跪讀之下仰見

皇上厯念要工諄切訓勉至意竊照展挑引河承辦各員

陸續開工及兩壩鑲築進占各緣由業經於十五

日恭摺奏蒙

聖鑒在案伏查此次所開引河於合龍後黃水下注不但  
二十九日已到江南碭山境南河叅將鄭永泰等

到工詢知黃水已過徐州尙有就下之勢其所以  
合而復開皆由引河長而逼窄宣洩不暢之故臣  
等從前亦曾籌慮及此無如此次所挑引河並非  
藉此引入正河實係挑挖數十里河身是以長至  
七千九百餘丈卽原估丈尺土方已多至二百七  
十餘萬爲從來堵築漫口所未有臣阿桂抵工後  
距開工已四十餘日查勘工程止有三四分實深  
焦急不遺餘力晝夜嚴催僅能照估完竣業已曠  
日持久勢不能再行加寬希冀合龍大溜全入可  
以衝刷寬深孰知灘地凍土一時衝刷不動致復

決裂至工程堤岸時遇嚴冬卽停止興築恐凍土  
至春融化不能堅實而堵築漫工則不能因天寒  
停待卽如臣李奉翰上年堵辦張家油房漫口亦  
於十一月二十四日合而復開上緊儻辦於十二  
月中旬冰凌擁擠時堵合竣事仍在嚴寒節候現  
在因東壩於淺水內進做恐水長搜刷壩根罅漏  
進水用膠泥築做外戩並用膠泥築做夾土壩重  
重保護以期涓滴不漏然亦不能不用凍土卽遍  
詢在工大小員弁實亦無別法使土不凍至前年  
堵築儀封十堡漫口堵合後有蟄陷之事亦由引

河未暢彼時續行展挑於土性稍堅處加寬至四十丈其鬆土浮沙則挑至三十丈內外現在籌辦情形將青龍岡起至孔家莊榮華寺楊家堂七千丈引河按灘面之高下土性之鬆堅加寬自三十丈至六七十丈不等其應挑深者並加挑深較前次十堡所挑丈尺有增無減更加寬深而引河之長則較多數千丈是以連楊家堂以下至芝蔴莊間斷抽溝及賈家莊展挑膠泥河身共估土方一百二十餘萬派州縣等官五十餘員分段承挑臣富勒渾早經飛速檄調而地方遠近不等其現在

工次及陸續先到者早已開工各挑至三四五分不等亦有甫經調到開工者而芝蔴莊以下間斷抽溝及賈家莊等處則尙未開工此時實難核定分數而計日論方按方定限總在正月初十日以前一律挑挖完竣堵合之期約在上元後節氣已交雨水斷不能再遲此時塌去壩工除金門外其東壩壩頭一帶但有埽底並未刷深已將壑陷處所補鑲齊全進做兩占西壩亦進一占因新淤甚厚儘力追壓到底再行進占目下口門存寬三十餘丈須俟展挑引河壩工儘有餘力每進一占俱

可鑲至數日加倍堅實總期引河挑挖寬深則開  
放計其容納之水較前多至一倍有餘自必宣洩  
暢注壩工不至著重易於堵合鞏固奏入  
諭曰覽奏俱悉亦無可別諭惟盡心虔禱賴

天佑

神助耳

二十八日

公偕李奉翰韓鏞富勒渾奏言臣等於本月十八  
日將展挑引河工段及兩壩鑲築進占情形繪圖  
貼說奏蒙



聖鑒數日以來東壩又進一占現在加鑲土坯儘力追壓  
西壩新淤稍覺刷動前次所進一占逐漸壓下俟  
追壓到底再行出占口門存寬二十八丈此次東  
壩所進數占因下有埽底恐不能穩貼督飭在工  
員弁多用乾草膠泥鑲墊平整逐層追壓每進一  
占鑲至三四日務令倍加穩固堅實所有外戩及  
夾土壩亦一律用膠泥築做夯礮堅實以期涓滴  
不漏至引河各段承挑官員內有先期到工較早  
者已挑至七八九分日內即可陸續告竣其路遠  
到遲於本月中旬開工者亦各挑至三四五分不

等<sup>臣</sup>阿桂派軍機司員與總理各員絡繹往來督同各府嚴催承辦州縣等官加添人夫上緊挑挖務令依限完竣目下已交春令天氣晴和人夫踴躍<sup>臣</sup>等惟有欽遵

訓諭益加敬凜慎重籌辦督催挑河堅築壩工竭盡心力以期一舉集事奏入報

聞